

verschidde Kategorië vu Fligerdeeler vir. Dës Adaptatioun ass duerch d' Ratifikatioun vun der Convention du Cap, déi de Kolleeg Marc Angel am Fréijoer hei presentéiert huet, noutwendeg ginn. D'Gesetz vun 1978 hat d'Hypothéik vun de Fligeren, déi duerch d'Konventioun vu Genève vun 1948 an d'Liewe geruff gouf, an eis Législatioun hei verankert.

Dës Hypothéik ass e wichtegt Instrument, wat et eiser Fligergesellschaft erlaabt, de Finanzement vun hiren deiere Fligeren iwwerhaapt ze assuréieren. D'Hypothéik op de Fligere gëtt de Kreditgeber, dat heescht de Banken, ähnlech, fir net ze soen, déiselwecht Garantië wéi bei enger Immobilienhypothéik. Dernieft assuréiert se awer och nach d'Mobilitéit vum Fliger, op deem d'Hypothéik berout; wat äusserst wichteg ass, well de Fliger, deem um Buedem immobiliséiert ass an net fléie kann, kengem eppes notzt.

D'Haaptobjektiv vun der Konventioun vum Cap huet dora bestanen, fir der Bank d'Kontinuitéit vun der Exploitatioun vum hypothekéierte Fliger ze assuréieren an esou d'Revenuen, déi doduerch entstinn, net ze beeinträchtigen. D'Konventioun fixéiert eenheetlech Regeln, fir d'Erstellung an d'Aschreiwung vun esou enger Hypothéik, déi bis elo vun deenen eenzelnen nationale Gesetzter bestëmmt goufen an nëmmen tëschent de Staten, déi d'Konventioun vu Genève ënnerschrifwen haten, gegollt hunn.

Eng vun de fundamentalen Neierunge vun der Konventioun vum Cap besteet doranner, datt déi zwou Parteien um Finanzement, dat heescht d'Bank an d'Fluggesellschaft, am Viraus, dat heescht dee Moment, wou de Kredit accordéiert gëtt, eng Défaillance vum Emprunteur kënnen virgesinn a Mesuré kënnen festleeën, wat mam Fliger geschéie soll, wann de Propriétaire mam Bezuelen net méi nokënn.

Dëst erlaabt der Bank séier d'Kontroll iwwert den hypothekéierte Fliger ze kréien, dat heescht de Fliger erëm esou schnell wéi méiglech un d'Fléien ze kréien; dat selbstverständlech am Respekt mat den internationale Virschrëften, wat d'Sécuritét ubelaangt. Staten, déi d'Konventioun vum Cap ënnerschréien, si verflücht, der Bank déi néideg Hëllef ze leeschten, fir datt si hir Rechter, déi se iwwert d'Konventioun an och den additionelle Protokoll kritt hunn, esou séier wéi méiglech kënnen geltend maachen.

Et ass e wichtegt Gesetz fir eis national Fluggesellschaften, dat et hinnen erlaabt, an Zukunft d'Uschafe vun hire Fligere méi bëlleger finanziéiert ze kréien, well de Kredit, deem d'Banken hinnen accordéiert, mat besser Garantië versinn ass.

D'Chamberskommissioun huet mäi Rapport den 3. Juli eenheetlech ugeholl. Si proposéiert selbstverständlech der Chamber dëst Gesetz ze stëmmen esou wéi et virläit. Ech bréngen heimat den Accord vun eiser Fraktioun.

» **Plusieurs voix.** - Très bien!

» **M. le Président.** - Merci, Här Hauptert. Ech si sécher, dass Der mer alleguerte bäiflicht, wa mer dem Här Norbert Hauptert Merci soe fir dee Rapport. Et ass net ëmmer e Cadeau, fir bei esou Projekte Rapporteur ze spillen. Hie mécht dat ëmmer an hie mécht dat gutt. Dofir gebührt him eise Respekt an eisen Dank.

(*Interruption et hilarité*)

Huet nach een eppes bäizefügen?

(*Négation*)

Da komme mer zur Ofstëmmung iwwert de Projet de loi, deem den Här Hauptert eis elo just presentéiert huet.

Vote sur l'ensemble du projet de loi et dispense du second vote constitutionnel

De Projet de loi 5698B ass eestëmmeg ugeholl mat 58 Jo-Stëmmen.

Ont voté oui: Mmes Sylvie Andrich-Duval (par M. Marcel Oberweis), Nancy Arendt (par M. Laurent Mosar), M. Lucien Clement, Mmes Christine Doerner (par M. Lucien Clement), Marie-Josée Frank (par Mme Martine Stein-Mergen), Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch (par M. Marcel Sauber), MM. Ali Kaes, Paul-Henri

Meyers, Laurent Mosar, Marcel Oberweis, Gilles Roth, Patrick Santer, Marcel Sauber, Marco Schank, Marc Spautz, Mme Martine Stein-Mergen, MM. Fred Sunnen, Lucien Weiler et Michel Wolter;

MM. Marc Angel, Alex Bodry, John Castegnaro, Mme Claudia Dall'Agnol, M. Fernand Diederich, Mme Lydie Err (par M. Roger Negri), MM. Ben Fayot, Jean-Pierre Klein, Mme Lydia Mutsch, MM. Roger Negri, Jos Scheuer (par Mme Claudia Dall'Agnol), Romain Schneider (par M. Alex Bodry), Roland Schreiner et Mme Vera Spautz;

MM. Eugène Berger, Xavier Bettel, Mme Anne Brasseur (par M. Xavier Bettel), M. Fernand Etgen, Mme Colette Flesch, MM. Charles Goerens, Paul Helminger (par Mme Colette Flesch), Alexandre Krieps (par M. Eugène Berger), Claude Meisch (par M. Fernand Etgen) et Carlo Wagner;

MM. Claude Adam, François Bausch, Félix Braz, Camille Gira (par M. Félix Braz), Jean Huss, Henri Kox et Mme Viviane Loschetter (par M. Henri Kox);

MM. Gast Gibéryen, Jacques-Yves Henckes, Jean-Pierre Koepp et Robert Mehlen;

M. Aly Jaerling.

Gëtt d'Chamber d'Dispens vum zweete Vote constitutionnel?

(**Assentiment**)

Dann ass et esou décidéiert.

Mir kommen dann zum leschte Punkt vun eise-m Ordre du jour vun haut. Dat ass de Second vote constitutionnel iwwert de Pacte logement.

Wie freet d'Wuert zu dësem Projet?

(*Interruption*)

Selbstverständlech, Här Kox. Wann Dir d'Wuert frot, da kritt Dir dat. Huet lech och roueg Zäit, fir dass näischt geschitt.

(*Interruptions*)

Mä lauschtert emol, Dir Dammen an Dir Hären, mir hunn eng Diskussioun vun dësem Projet virgesinn. Jiddferen, dee sech zu dësem Projet wëllt zu Wuert mellen, dee soll sech aschreiwen.

Här Kox, et ass esou, dass et geschéngt huet, dass kee sech hei zu Wuert géif mellen, bis Dir lech gemellt hutt. Wa mer awer elo eng Diskussioun féieren, dann, denken ech, sollt een der Rei no fueren.

Här Kox, et deet mer leed. Mir kënnen och, Här Hauptert, wann Der wëllt, den Här Kox fir d'éischt schwätze loossen, well en...

(*Interruptions*)

Da fuere mer schéin der Rei no. Den Här Rapporteur huet fir d'éischt d'Wuert. Här Hauptert, wann ech gelift.

9. 5696 - Projet de loi portant: 1. promotion de l'habitat et création d'un pacte logement avec les communes, 2. sur le droit d'emphytéose et le droit de superficie, 3. modification a) de la loi modifiée du 16 octobre 1934 concernant l'évaluation des biens et valeurs; b) de la loi modifiée du 1^{er} décembre 1936 sur l'impôt foncier; c) de la loi modifiée du 25 février 1979 concernant l'aide au logement; d) de la loi modifiée du 10 décembre 1998 portant création de l'établissement public dénommé «Fonds d'assainissement de la Cité Syrdall»; e) de la loi modifiée du 30 juillet 2002 déterminant différentes mesures fiscales destinées à encourager la mise sur le marché et l'acquisition de terrains à bâtir et d'immeubles d'habitation; f) de la loi modifiée du 19 juillet 2004 concernant l'aménagement communal et le développement urbain; g) de la loi du 21 septembre 2006 sur le bail à usage d'habitation et modifiant certaines dispositions du Code civil

- **Second vote constitutionnel**

» **M. Norbert Hauptert (CSV), rapporteur.** - Här President, am Fong geholl wollt ech net Stellung zu dësem Projet huelen, mä wann d'Diskussioun schonn opgeet, dann erlaabt mer trotzdeem kuerz drop anzegoen.

Also et ass den zweete Vote zu engem Projet de loi, dee mer am Summer hei an enger éischter Lecture ofgestëmmt hunn. Fir de Projet hat am Fong geholl de Statsrot nach, no all deenen Amendementer, déi mer proposéiert hunn, finalement dräi Oppositions formelles virgesinn. Déi éischt war déi, déi d'Virkafsrecht vun de Gemengen an dem Fonds du Logement op deenen Terrainen hunn, déi un de Bauperimeter vun der Gemeng ugrenzen.

Eng zweet huet d'Taxe d'obligation de construire als Alternativ zur Expropriatioun bedeit an eng drëtt war déi, datt de Stat am-plaz vun de Gemenge kéint Expropriatiounen, am Fall vun enger Obligation de construire, virhuelen.

Mir haten an der Chamberskommissioun am Rapport versicht, mat deenen néidegen Argumenter déi Oppositione vum Statsrot - oder weinstens d'Meenung vum Statsrot - kënnen ze änneren. De Statsrot huet awer, a senger Décisioun vun der Dispens vum zweete Vote constitutionnel, déi Dispens net ginn, wat säi Recht ass, an duerfir musse mer haut eng zweete Kéier heiriwwer ofstëmmen.

Ech wier frou, wa mer kéinten dee Projet an der zweeter Lecture esou ofstëmmen, wéi mer en an der éischter Lecture virgeholl hunn, an ech bréngen och heimat den Accord vun eiser Fraktioun.

Merci.

» **Plusieurs voix.** - Très bien!

» **M. le Président.** - Merci, Här Hauptert. Éischten ageschriwwene Riedner ass den honorabelen Här Berger. Ech wëll lech soen, dass mat deene Wuertmeldungen, déi ech bis elo hunn, d'Debatt sech ongeféier iwwer eng Stonn hinzéie wäert, fir dass jiddferen sech kann ariichten. Den Här Berger huet elo d'Wuert.

Discussion générale

» **M. Eugène Berger (DP).** - Merci, Här President. Dir Dammen an Dir Hären, virun iwwer dräi Méint hu mer jo schonns eng Kéier hei an der Chamber iwwert de virleiende Projet, de sougenannten „Pacte logement“ debattéiert an ofgestëmmt. Well awer deemools d'Majoritéitsparteien, d'CSV an d'LSAP, iwwert d'Bedenke vum Statsrot ewechgaang waren an och déi verschidden Oppositions formelles vun der héijer Kierperschaft ignoréiert haten, musse mer haut nach eng Kéier iwwert den Text befannen.

Ech verstinn, datt d'Leit presséiert sinn, mä ech fannen, datt et awer e wichtige Sujet ass, besonnesch wann ee muss en zweete Vote huelen, a mer eis also dann Zäit sollen huelen, fir nach eng Kéier hei iwwert deen Text an aller Serenitéit kënnen ze debattéieren.

» **Une voix.** - Très bien.

» **M. Eugène Berger (DP).** - D'Regierung an d'Majoritéitspartei kruten also Bedenckzäit, mä dat huet awer näischt gehollef, well jo kee Jota um Text geännert ginn ass. D'Positioun vun der Regierung huet net geännert an där leschter Zäit an et wäert lech net wonneren, datt d'DP also och net hir Meenung geännert huet zu deem Text.

Ouni am Detail op all Awänn a Remarquen zum Text anzegoen, wëll ech nach eng Kéier e puer wesentlech Punkten ervirsträichen. Interessant ass et awer och, an dat ass dann aktuell, fir e Bléck ze werfen op d'Situatioun um Terrain, fir ze kucken, wat fir eng Evolutioun mer dann elo an deene leschte Méint och ouni Pacte logement konnte feststellen.

Et ass ganz interessant, gëschter an der Chamberskommissioun vun de Classes moyennes hate mer en Austausch mat Leit vum Observatoire de l'Habitat, déi déi lescht Entwécklungen um Terrain kommentéiert a chiffriert hunn. Eng Feststellung, déi ee ka maachen: Mir hunn effektiv eng Stabilisatioun vun de Präisser säit e puer Méint.

Et kéint een och soen, et huet een eng manner grouss Progressioun vun der Deierecht. Am Vergläich mam Virjoer hu mer awer nach +5% Deierecht bei Apparterement, +3% Deierecht bei den Haiser. Dat am Vergläich mat dem Virjoer; ech beruffe mech op déi Zuelen, déi mer gëschter an der Kommis-sioun gesot kruten.

(*Brouhaha et coups de cloche de la Présidence*)

Och interessant, den Här Minister Boden hat an engem Face à face op RTL - ech mengen et war den 10. oder 11. Juni - gesot, déi liicht Präisstabilisatioun, dat wier schonn den éischten Effet vum Pacte logement. Dat kann een also och nolauschteren an den RTL-Archiven.

Ech fannen dat zimlech bosseg, well de Pacte logement war an ass jo och de Moment nach net gestëmmt, an do hat dann den Här Boden wahrscheinlech sech a Wonschdenke geübt.

Ech interpretéieren déi Zuelen awer anescht wéi den Här Boden. Virun allem, schéngt et mer, si se en Effet vun der ofhuelender Kafkraaft vun den eenzelne Bierger a Stéit hei zu Lëtzebuerg. Well en anere Constat, deen ee parallell ka maachen, dat ass, obwuel d'Haiser männer progresséieren an der Deierecht, datt der awer net méi verkaaft ginn. Au contraire, de Verkaf vun den Haiser geet zrëck.

Et kéint ee jo soen, dat ass well elo jiddferen da seng Wunneng huet. Dat ass awer och net de Fall, well op där anerer Säit stellt ee fest, datt d'Locatiounen amgang si ganz staark zouzehuelen. D'Leit hei am Land sichen also ëmmer nach eng Plaz fir ze wunnen an trotz enger Präisstabilisatioun sti vill Familljen, besonnesch an der Mët-telschicht, déi jo och ëmmer méi mat hirer ofhuelender Kafkraaft an d'Quëtsch kommen, viru grouss Problemer sech en Eegenheem kënnen ze leeschten.

Sécherlech kommen och elo nach an de leschte Wochen an Deeg déi Schwierigkeeten derbäi, datt et och wahrscheinlech méi schwéier gëtt e Prêt ze kréien, fir wann ee sech wëllt en Eegenheem uschaffen.

Oder mir hunn dann deen Effet, datt d'Leit an d'Grenzregioun vum den Nopeschlän-ner regelrecht auswanderen. An Däitsch-land hu mer jo do déi Kolonien op där ane-ner Säit vun der Musel, do wou d'Brécke sinn. Et ass och interessant, gëschter an der Kommissioun krute mer Auskunft iwwert d'Zuel vun deene Leit, déi an d'Nopesch-regiounen ginn.

Ech hat nach am Juni, bei dem éischte Vote, vun enger Zuel vu 7.000 Leit geschwat - Lëtzeburger -, déi anscheinend am Aus-land géife wunnen. Awer gëschter krute mer gesot, datt dat vun 2001 u bis 2008 12.000 Persounen wieren. Ech louch also do wäit drënner, wat ech mat menge 7.000 avan-ciéiert hat.

(*Mme Colette Flesch prend la Prési-dence*)

Et muss een och berücksichtegen, datt ëmmer méi Jonker méi lang doheem bleiwen, well se eben net déi néideg Mënz hunn, fir sech kënnen eng Wunneng unzeschaffen.

(*Interruption*)

Ech hat gesot, och am Juni, datt de Pacte logement, esou wéi e virläit, keng adequat Äntwert ass op d'Versoe vum Premier a sen-ger Regierung - „d'Versoe vum Premier“: deen Term hat hie selwer gesot. Här Cle-ment, esou hat de Premier selwer déi Situa-tioun duergestallt.

Bon, net nëmmen dat. De Projet riskéiert eng Rei juristesche a verfassungsrechtlech Problemer ze schafen, déi herno mussen d'Gerichter tranchéieren. Déi Plainte, déi jo elo bei der Kommissioun zu Brëssel age-reecht ginn ass, gëtt do schonn en éischte Virgeschmaach.

Den Här Boden huet e Gesetzestext ausge-schafft, wou de Statsrot, Juristen an eng Rei Experten aus deene verschiddensten Domäner all zu enger Konkusioun kommen: Mat dësem Text wäerte mer net haut, an och net an Zukunft, méi schnell an och net méi bëlleger hei am Land bauen. Hei huet d'Re-gierung, dat muss ee ganz kloer soen, an esou engem wichtige Dossier versot. Déi Hällewull vu Kritiken a pertinenten Opposi-tions formelles, déi zu deem Text erakomm sinn, hate jo genuch gesot.

Ee Punkt, dee ganz vill diskutéiert gouf am Projet de loi, ass dee vum staatlechen a kommunalen Agrëff an de Wunnengsmaat. Mir sinn net iwwerzeegt, als DP, datt de Stat méi bëlleger a méi schnell ka bauen. Bei öf-fentleche Gebaier, zum Beispill Schoulen an aner Gebaier, gesi mer dat ëmmer erëm, datt dat oft fënnef, sechs a méi Joren an Usproch hält, an och zu Lëtzebuerg kann d'Spill vun der Offer an der Demande nun emol net ausser Kraaft gesat ginn, wéi mer dat an de leschte Statistike jo och gesinn hunn.

Wann also d'Gemengen als Promoteur op-trieden, mussen alleguerten d'Décisiounen duerch de Gemengerot a vum Innenminis-tère approvüiert ginn. Ech hat och schonn am Juni gesot, datt vun der Ënnerzechnung vum Pacte logement bis zum Schlës-seliwwerreeche wäerten alt bis zu aacht

Joer oder méi vergoen. An där Zäit muss sech de Gemengerot - ech hat deemools dem Här Chamberspresident d'Lëscht eragi mat deenen eenzelnen Etappen - 14 Mol mat dem Dossier befaassen, a vun der Säit vum Innenministère si 36 Genehmigungen noutwendeg. Wien dat net wëllt gleewen, dee kann dat nokucken. Ech huelen un, Madame Presidentin, datt dat nach hei iergendwou wäert an den Archive vun der Chamber klasséiert sinn.

Et ass och erstaunlech, datt op eemol dann den Innenminister respektiv d'Regierung d'Gemengen als Promoteur gesäit, well bis elo ganz oft d'Initiative fir méi geschäftlech Autonomie, zum Beispill als Exploitant vun erneierbaren Energien, ëmmer haaptsächlech vum Innenministère ofgeblockt gi sinn. Dierneft muss een dann och, wann ee wëllt méi schnell bauen, onbedéngt d'Flächennotzungsgesetz vun 2004 reforméieren, fir eben déi Prozedursdauer verréngeren ze kënnen. Och hei huet d'Regierung hir Aufgaben net gemaach.

Insgesamt stelle mer fest, an dat huet jo och nach viru kuerzem den Handwierkerverband gesot, datt mer hei zu Lëtzebuerg einfach ze laang Prozeduren hunn, an datt dat sécherlech och am ganze Secteur vum Immobiliär en Hënnernis ass.

Wann de Stat an d'Gemengen als neien Acteur op de Marché kommen, gëtt de Baurrain hei zu Lëtzebuerg och net méi bëlleg. Mat der öffentlecher Hand kënnt en zousätzlechen Acteur op de Marché, deen d'Demande dann nach an d'Luucht dreift. Ech wëll betounen, datt, och wa mer gëschter Statistike kruten iwwert d'Präisser vun den Haiser an Appartemeneter, keng Donnéeë virgeluecht gi konnten iwwert d'Präisser vun den Terrainen. Bei den Terrainen ass et op alle Fall esou, datt do d'Präisser nach ëmmer ganz héich sinn. Wann elo nach en zousätzlechen Interessent, en zousätzleche Keefer, de Stat oder d'Gemengen, oprieden um Marché, dann ass et jo normal, datt de Produit wäert méi deier ginn, datt d'Präisser an d'Luucht ginn. Ech hat dat am Juni „basic economy“ genannt.

Den Här Boden hat am Juni gefrot, wat mir da géifen am Géigesaz proposéieren. Mir hunn - an ech ginn elo hei net op all déi Punkten an - ënner anerem an eisem Familljepabeier stoen, datt mer derfir sinn, de Familljen hei zu Lëtzebuerg méi konsequent beim Kaf vun enger Wunneng ze hëllefen an ze kucken, datt se méi bëlleg dorunner kommen. Duerfir hu mer e Wunnegeld fir Familljen hei zu Lëtzebuerg proposéiert. Esou eng Leeschtung, mir hunn dat vun Experten iwwerpréiwe gelooss, wier net exportabel, déi géif all deenen hei am Land zeguttkommen, déi Kanner hunn an déi hei wëlle wunnen a bauen. Doriwwer eraus kënnt een dann déi Hëllefen och méi selektiv staffelen an och sozial ausrichten.

Verschiede Mesuren, déi de Pacte logement virgesäit, sinn net konform zur Constitution. Ech zielen dann nach eng Kéier schnell e puer op, déi wichtegst: D'Virkaftsrecht fir d'Gemengen, de Stat an de Fonds du logement verstéisst géint den éischte Protokoll vun der europäescher Convention des droits de l'Homme souwéi géint den Artikel 16 vun eiser Verfassung, deen den Droit de propriété regelt. Doriwwer eraus muss ee sech och nach froen, ob, wann d'Gemengen dat Virkaftsrecht hunn, se déi néideg finanziell Ressourcen hunn, fir esou e Recht kënnen auszeüben.

D'Juriste weisen dann och nach op eng aner Schwierigkeet hin, an zwar op d'Disposition, déi virgesäit, datt de Projet vun engem Promoteur vun enger gewëssener Gréisst u muss 10% Sozialwunnengen enthalten. Dat verstéisst géint den Artikel 10bis, 11 a 16 vun eiser Verfassung souwéi géint den éischten Artikel vum Premier Protocole. Doriwwer eraus muss ee sech och froen - wa Privatprojete soziale Wunnengsbau beinhalte mussen -, wéi dat geregelt ass par rapport zu der Situation vum Fonds du logement zum Beispill. Kréie se déiselwecht Hëllef respektiv kënnen se do och op déiselwecht Subside vum Stat zrëckgräifen, oder si se do benodeelegt an et gëtt fir si quasi eng Zort vu Concurrence déloyale?

Dann ass do nach déi steierlech Begënschtigung vun de Plus-valuë beim Verkaf vun Terrainen un d'öffentlech Hand, déi géint den Artikel 10bis vun eiser Constitution verstéisst. De Statsrot huet sech a sengem Avis jo och formell dergéint ausgeschwat, dee Prinzip bäizebehalen, wouno d'Plusvaluen, déi ee beim Verkaf vun engem Terrain oder engem Haus un de Stat realiséiert, steierfräi sinn, beim Verkaf un e Particulier oder Gesellschaften awer net. D'Regierung geet also gezielt an eng Richtung vun enger manifester Atteinte un de Prinzip vun der Egalitéit virun de Steiergesetzter. Et wäert also sinn, wéi esou oft, datt de Pacte logement herno wäert vun de Gerichter a seng Grenze verwise ginn.

E weidere Punkt, dee vill Froen opwerft, ass dee vun de Subventionne fir d'Gemengen, déi e Pacte logement ënnerschreiwën. Falls ee Subventionen un d'Gemenge gëtt, si mer der Meenung, datt een dat muss no Kritäre maachen, déi eng Gemeng erfüllt, an net nëmme well eng Gemeng eng Konvention ënnerschriwwen huet. Hei versicht de Stat jo och nees eng Kéier eng Emprise op d'Gemengen ze kréien oder seng Emprise op d'Gemengen auszubauen, wat net konform zum Artikel 99 vun der Verfassung ass. Mir sinn éischter der Meenung, datt, wann d'Statsrot huet jo och a sengem Avis drop higewisen, datt dës Measure eng Violation vum Prinzip vun der Autonomie communale ass, mä, wéi gesot, d'Regierung hält trotzdeem och un deenen Dispositionne fest.

Mir wëlle staark Gemengen, déi hir eegen Initiativen ergräife kënnen, an duerfir sollt een éischter iwwerleeën, déi Suen ze benotzen, fir eng Reform vun de Gemegefinanzen an Ugrëff ze huelen. Mir sinn och dergéint, datt et de Gemenge soll iwwerlooss bleiwen, eng Steuer op net bebautem Terrain oder net bewunnte Wunnengen ze erhiewen. De Statsrot huet jo och a sengem Avis drop higewisen, datt dës Measure eng Violation vum Prinzip vun der Autonomie communale ass, mä, wéi gesot, d'Regierung hält trotzdeem och un deenen Dispositionne fest.

E lescht Wuert nach zu deem manner juristeschen, mä méi konzeptuellen Aspekt vun deem ganzen Text. Do wëilt ech nach eng Kéier op den Avis vum Dokter Ewringmann zrëckkommen, dee monéiert huet, datt ee misst vill méi geziilt ausgewielte Projete finanzéieren, an datt dat misst besser op den IVL ofgestëmmt ginn, well soss den Effet virun allem doranner géif bestoen, datt d'Perimetre géifen ausgeweit ginn, wat net am Sënn vun der Nohaltegkeet a vun enger rationaler Notzung vum Buedem wier. Dat ass eppes, wat an eisen Aen och ganz wichteg ass, datt mer do sollten e Gesamt-konzept hunn.

Wéi hänkt dat Ganzt zesumme mam IVL? Dat ass jo dee berühmte Pabeiertiger, wéi den Här Halsdorf gesot hat, dee jo awer nach ëmmer, souwäit ech dat feststelle kann, net vun der Regierung a Fro gestallt ass. Wéi agencéiert sech dee ganzen Text mat dem Plan sectoriel logement, wou den Här Halsdorf nach ëmmer kee Plang virgeluecht huet?

Madame Presidentin, ech maachen et kuerz, ech wëll just op déi aner Argumenter verweisen, déi ech och am Juni a menger Ried méi ausféierlech duergeluecht hunn. Am Résumé bleift dës Projet de loi e Fléckwierk, wou dat Zesummespill tëschent Ekologie, Économie a Soziales, also d'Nohaltegkeet net zum Droe kënnt.

Madame Presidentin, mir si weiderhin der Meenung, datt dës Projet net effizient, net nohalteg ass. Baue gëtt mam Pacte logement, esou wéi en hei virläit, net méi bëlleg an et gëtt och hei zu Lëtzebuerg net méi schnell doduerjer gebaut, an d'Leit kommen net méi schnell zu Wunnengen.

Den Text, deen d'Regierung virgeluecht huet, werft dierneft ganz pertinent rechtlech Froen op, déi nei Problemer wäerte mat sech bréngen, déi an Zukunft dann erëm musse vun de Gerichter tranchéiert ginn. Et wäert lech also net verwonneren, datt mir och dës Versioun vum Pacte logement, déi déiselwecht ass wéi am Juni, net wäerte stëmmen.

Ech soen lech Merci.

» **Plusieurs voix.** - Très bien!

» **Mme le Président.** - Merci, Här Berger. Als nächst Riednerin ass d'Madame Spautz ageschriwwen.

» **Mme Vera Spautz (LSAP).** - Merci, Madame Presidentin. Kolleginnen a Kollegen, eigentlech huet un den Donnéeën näischt changéiert, awer och absolut näischt changéiert vun deem, wat mer viru véier Méint diskutéiert a gestëmmt hunn. Also, ech hunn elo eigentlech keng nei Erkenntnis an deem héieren, wat de Vertrieeder vun der DP gesot huet.

Fir mech gëtt et zwou Saachen, déi wesentlich changéiert hunn, vun deenen ech awer denken, dass kee Mënsch hei am Sall se sech esou konnt virstellen. Dat éischt ass awer schonn déi zimlech Onverfruerenheet an dee Culot, deen ee muss hunn, fir zu Bréissel anonym - anonym! - eng Plainte ze maachen.

Ech hu viru véier Méint gesot, et wäerten nach eng Rei Lobbyisten hei fatzeg géint dee Pacte logement Stuerm lafen. Ech hat gesot, dass och mir als LSAP gäre gehat hätten, a verschiddene Punkte kënnen wederzegoen, wat awer elo net de Fall ass, an dass eng ganz Rei Lobbyisten, anerer awer,

géifen nach ganz massiv dru schaffe bis zum zweete Vote, fir kënnen verschidde Saache verhënnert ze kréien. Dass et esou wäit géif goen an dass déi hir Fratz esou géife weisen, dat heescht, andeem se hir Fratz net weisen...

(*Interruption*)

...an anonym - anonym! - eng Plainte maachen, dat ass scho wierklech e ganz staarkt Stéck!

(*Interruptions*)

Gëschter ass an der Kommissioun schonn eng Kéier gesot ginn,...

(*Interruptions diverses*)

Gëschter ass schonn eng Kéier an der Kommissioun doriwwer eppes gesot ginn. Här Henckes, Dir kënnt deenen dat da soen, déi déi Plainte gemaach hunn, wat hei geschwat ginn ass a gëschter geschwat ginn ass an der Kommissioun. Also, et ass e staarkt Stéck, fir sech net ze weisen an anonym Stuerm ze lafen.

Den zweete Punkt, deen ech awer - an ech denken och eng ganz Rei Leit - méi wichteg fannen, oder wat den neie Moment ass elo beim zweete Vote vum Pacte logement, dat ass dat, wat eis zënter enger Woch oder 14 Deeg wierklech an Otem hält, dat ass d'Finanzkris.

Dovunner wäerte mer Auswierkungen hunn op dat, wat elo gestëmmt gëtt, op de Wunnengsmaat, net eleng op de Pacte logement, awer op dat, wat um Wunnengsmaat hei leeft. Ech denken, do wäerten eng ganz Rei Saachen op eis zoukommen, wou mer musse soen, do musse parallel elo scho Mesurë geholl ginn, fir an eng Richtung ze goen, fir dat kënnen opzefänken.

Et wäerte Leit herno déi Präisser net méi kënnen bezuelen, déi gefrot ginn, respektiv net méi op de Banke Geld geléint kréien, an et wäert och eppes passéieren, wou mer ëmmer virdru gewarnt hunn, parallel zu deene Mesuren, déi elo a Kraaft trieden, wéi dat och zum Beispill beim Mietsgesetz an och elo beim Pacte logement war: Mir musse vill méi an de Locatif eragoen, kucken, Mietwunnengen zu abordabele Präisser ze kréien, fir Leit opzefänken, déi an Zukunft wäerte ganz staark Problemer kréien.

Dat si fir mech déi zwéi nei Momenter: d'Finanzkris an dat falscht Spill, wat gedriwwen ginn ass.

(*M. Lucien Weiler reprend la Présidence*)

Nach wie vor ass et esou, dass eis Partei dës Pacte logement wäert stëmmen, och, wéi ech gesot hu viru véier Méint, mat schwéierem Häerz. Trotzdeem ass et eng Measure, a mir wäerte mathëllefen, anerer ze entwëckelen, fir dass et net zu der absoluter Kris och hei um Wunnengsmaat kënnt, esou wéi mer se elo kennen an de Finanzen.

Merci.

» **Une voix.** - Très bien!

(*Interruptions*)

» **M. le Président.** - Merci, Madame Spautz. Den honorabelen Här Kox huet d'Wuert.

» **M. Henri Kox (DÉI GRÉNG).** - Ech wäert probéieren, mech kuerzzeffaassen an awer just op dee wesentleche Punkt nach eng Kéier zrëckkommen, firwat mir dës Pakt wëllen oflehnen.

Wéi Der wësst, ass virun enger gudder Woch oder zéng Deeg um Kierchbiërg d'Semaine du logement ageweit ginn, wat a sech eng ganz flott Saach ass - dat soll een och emol eng Kéier ervirsträchen. Dat si jo och positiv Elementer, déi do lafen, well et kritt een eng Abberzuel vu gudden Informatiounen do.

Wat mech awer e bëssen iwwerrascht huet, dat ass d'Konklusioun oder d'Ausso vum Här Minister bei der Ouverturesried, zum Beispill: „D'Lag um Wunnengsmarché huet sech berouegt: D'Moosname vun der Regierung hu Wierkung gewisen, esou datt d'Wunnen hei zu Lëtzebuerg och an der Zukunft fir jiddferen erschwënglech bleift.“ An nach e weidere Punkt: „De Pacte logement huet derzou bäigedroen, datt eng Abberzuel vu Wunnengsobjekter de Wee op de Maart zrëckfonnt hunn.“

(*Interruption*)

Tipptopp, mir brauchen also dës Gesetz guer net méi ze stëmmen, well schonn d'Ukënnegung eleng vum Gesetz Angscht a Schrecken ënnert de Promoteuren ausgeléist huet, eng Angscht, déi dozou gefouert huet, dass d'Offer um Marché neierdängs méi grouss ass wéi d'Demande.

Ech muss lech awer enttäuschen: Déi Freed kënnen mir awer net esou direkt mat lech deelen. Net dass mir eppes dergéint hätten,

dass d'Präisser elo endlech erofginn. Mä dat eleng op d'Aarbecht vun der Regierung zrëckzeféieren, schéngt mer awer e staarkt Stéck ze sinn.

De Marché huet sech säit 2004 staark verännert. Mir sinn u sech net méi am selwechten Zeenario, wéi wéi éischt Diskussiounen ëm de Pakt ugefaangen hunn. Villes huet sech säitdeem geännert, vun der momentaner Finanzkris - et ass virdru gesot ginn - an der Gefor vun engem lwwerschwappen op d'Realeconomie emol guer net ze schwätzen. Eng Finanzkris, déi sécherlech och hei zu Lëtzebuerg Auswierkungen op de Wunnengsmarché wäert hunn.

Säit 2004 huet d'Unzuel vun de Bauautorisatione Joer fir Joer stänneg zougehoen. D'Resultater vun deene Bauautorisatione si schwaarz op wäiss an de rezente Publikatione vum Observatoire de l'Habitat nozeliesen. D'Präisser ginn effektiv bei der Vente vun den Haiser an och vun den Appartemeneter säit dem éischten Trimester 2008 lues awer sécher erof, ëm de Schnëtt vun 3%. Ze hoffen ass, dass dat och en dauernde Prozess wäert bleiwen.

Et stellt sech d'Fro, wien dann elo responsabel ass fir d'Autorisatione vun den Haiser auszustellen, de Stat oder d'Gemengen? Et sinn natierlech d'Gemengen, déi d'Autorisationen ausgestallt hunn. Si waren déi, déi grouss Effortë gemaach hunn, fir zu dëser Entwëcklung bäizedroen.

Wann Dir et vläicht net wëllt soen, ma da soen ech et fir lech, nämlech e Merci u sämtlech Gemenge vu kleng bis grouss, IVL-konform oder net IVL-konform. Dir hutt derzou bäigedroen, dass endlech eng Entspannung um Wunnengsmarché festzestellen ass.

D'Gemengen hu kee Pakt mat dem Stat gebraucht. D'Gemengen hu keng Sue gebraucht, fir d'Autorisationen auszustellen. D'Gemengen hunn aus fräie Stécker all déi Jore scho Bauprojeten autoriséiert. Wat éischer vun de Gemenge gebraucht gi wär, wär eng staatlech Hand, fir ze hëllefen, statt engem staatleche Fanger, fir unzékloen.

Firwat - nach eng Kéier kuerz - mer haaptsächlech dës Projet oflehnen: Mir fannen et nach ëmmer falsch, datt hei de Stat probéiert, sech mat Geld aus der Wunnengspolitik fräizekafen an dobäi déi ganz Verantwortung op d'Gemengen ofzewälzen. Geld, wat an eisen Aen an déi falsch Richtung wäert fléissen an d'Feelentwëcklung vun de leschte Jore souguer nach zementéiere wäert.

Dës Gesetz féiert just zu méi groussen Onzefriddenheete bei de Mengenauctoritéiten. Besonnesch kleng Landgemenge wäerte probéieren, och un déi Suen ze kommen. Et kann een hinnen dat emol guer net verdenken, wëssend, dass jo stänneg nei Aufgabe vum Stat op d'Gemengen ofgewälzt ginn. Fir déi Suen awer vum Pakt ze kréien, musse si mindestens 30 nei Awunner am Joer opuhelen. Dës bedeit bei enger Gemeng vun 1.000 Awunner e Wuessstum vun 3% pro Joer. Op d'laang Siicht kann dat nëmme zu engem onkoordinéierte Wuessstum vun de Landgemenge féieren, besonnesch wa gewosst ass, dass grad am ländlechen Raum de meeschte Baurrain nach ze fannen ass.

Wann een dann nach héiert, dass vum Intérieursministère och nach éischer an dës Landgemengen op Eefamilljenhaiser gesat gëtt, kann ee sech liicht ausmolen, wéi de Flächeverbrauch weiderhin an d'Luucht wäert goen. Dës ka jo awer net am Sënn vun enger nohalteger Entwëcklung sinn.

Aner Gemengen, déi duerch natierlech Gegebenheete vun hirem Terrain, vun hirem Topographie, vun hirem Geographie net d'Méiglechkeet hunn, ze wuessen, ginn eidel aus. Dee Frust konnt ee jo scho bei münchen Zeitungsartikelen vu Gemengerotsberichter, wou et iwwert de Pacte logement gong, nolliesen.

Aner Gemengen erëm mussen, fir un de Genoss vun deene Suen ze kommen, spezifesch Taxen aféieren. Taxen, déi wuel hir Berechtigung hunn, déi mir jo och scho laang matgefuert hunn, wéi déi op Baulücken oder och vun eidel stehenden Haiser, déi awer net an all Gemeng agefouert musse ginn. Esou kënnt et, dass déi eng Gemeng

ouni Taxen un de Genoss vun de Sue kënnst an déi aner dergéint déi Taxen natierlech muss aféieren.

Mir hunn do vun deenen 117, méttlerweil 116 Gemenge bestëmmt och herno, wa se all ënnerschreiwen, ënnerschiddlech Konventiounen.

Wéi a wien décidéiert, ob déi Konventioun dann elo richteg agehale gëtt? Wéi ass et mat der Transparenz vun dëser Entscheedung, déi an eisen Aen op vill ze vill subjektive Kritäre berout? Et ass dëst, wat ech hei nach eng Kéier wollt ënnersträichen. Mir hätten et léiwer gesinn, dass déi Suen an eng staatlech Wunnengsbaugesellschaft komm wären, déi am Numm vun de Gemengen Terrainen dofir opkeeft. Well et kann net sinn, dass d'Gemeng Punkt fir Punkt eenzel Projeten opkeeft oder Terrainen opkeeft ouni de landesplaneresche Kritären ze entsprechen.

Duerfir zum Schluss nach eng Kéier: Gitt lech e Ruck, stëmmt d'Gesetz net an iwwerleet lech nach eng Kéier landesplaneresch Kritären anzeféieren, fir eng gutt an nohaltteg Politik hei auszeféieren!

Merci fir d'Nolauschteren.

» Une voix.- Très bien!

» M. le Président.- Merci, Här Kox. De leschte Riedner ass den honorabelen Här Henckes.

» M. Jacques-Yves Henckes (ADR).- Här President, Dir Dammen an Dir Hären, wéi mer déi leschte Kéier iwwert dëst Gesetz debattéiert hunn, hunn ech gesot, dass ech dem Här Logementsminister géif félicitéieren, well hien et fäerdeg bruecht huet, dat schlechteste Gesetz vun dëser ganzer Legislatur ze déposéieren.

Et ass dat Gesetz, wat effektiv net de Wunnengsbau méi bëlleg a méi attraktiv mécht, mä méi deier. Alles ass hei an dësem Gesetz gemaach, fir de Wunnengsbau méi deier ze maachen deen Ablack, wou et a Kraaft trëtt. Woufir? Ma well mer scho wëssen, dass mer ganz laang Prozeduren hunn, fir zum Beispill e PAP genehmegt ze kréien. Theoretesch sinn et sechs Méint, mä praktesch gesäit een oft, dass dat fënnef a sechs Joer an der Moyenne dauert, deen Ablack, wou de PAP e bësse méi grouss ass.

Do hat ech mer erwaart, dass d'Regierung géif Akzenter setzen, fir e bësse méi Leit anzestellen, fir ze kucke fir d'Prozeduren ze vereinfachen, dass deen, deen an en Terrain investéiert, well e wëllt bauen, deen Ablack net jorelaang muss mat senger Investitioun, senge Sue waarden, well et einfach administrativ net virugeet. An elo kréie mer nach méi Formalismus an dat Ganzt mat eran. Dëst Gesetz gëtt also just nuren en Trend, fir de Wunnengsbau méi deier ze maachen.

Den Här Minister - ech weess dat - huet ëmmer eng gutt Excuse. Hie seet: Dat war ënnert der viregter Regierung déi béiss DP, déi ons dat doten octroyéiert huet. Dat ass net onbedéngt...

(Interruption)

Et war eng Kommissioun heibannen, déi dat déi leschte Kéier majoritär guttgeheesch huet, an de Minister muss dat elo ausféieren.

(Interruption)

Dat mag och nach sinn, mä d'Resultat ass awer net gutt. A wann ee gesäit,...

» M. Xavier Bettel (DP).- Dir hat erëm eng gutt Influenz.

(Coups de cloche de la Présidence)

» M. Jacques-Yves Henckes (ADR).- ...wat dobäi erauskënnst, da gesäit een, dass dat heiten e schlecht Gesetz ass, wat net nuren näischt zum Wunnengsbau bäidréit, fir e méi bëlleg ze maachen, mä wat zum Problem, fir méi Sozialwunnengen a méi Mietwunnengen ze kréien, wat d'Aufgab vum Stat ass, näischt Wesentlechtes bäidréit. Och do ass effektiv e Manktum do.

Da muss ee festhalen, dass mer elo nach déi juristesche Schwierigkeeten, op déi mer bei der leschter Debat higewisen haten, direkt illustréiert kréien duerch déi Plainte, déi net anonym ass; bei där also ganz identifizéiert ass, wien et war. D'Commission européenne weess dat.

(Interruption)

Dat Eenzezt, wat ass, dat ass, wann Der am Formulaire kuckt, deen et dofir gëtt, do steet dran: « tes-vous autorisé à dévoiler l'identité? » Et ass deen Ablack net anonym. Dat heescht, eng anonym Plainte ass et net.

Dat, wat à la base ass, ass eng Violatioun vun den Artikele 86, 87 an 88 vum Traité de Rome. Et geet notament ëm eng etlech Artikelen aus dem Gesetz vum Pacte logement, an zwar déi Artikelen 30-5, 31-6, 30-2.1, 30-2.2 an 3, Alinea 6. Dat sinn déi Texter, wou effektiv eng Violatioun oder eng Contradictioun besteet mat den Dispositiounen vum Traité de Rome an och mat deenen Décisiounen, déi d'Europäesch Kommissioun a ganz ville Fäll scho geholl huet, notament wat déi Hëllef an déi indirekt Hëllef bei dem Droit de préemption ugeet. Do si schonn ähnlech Condamnatiounen virgeholl ginn.

» M. Fernand Boden, Ministre des Classes moyennes, du Tourisme et du Logement.- Dat ass wierklech egal wat! Dir sot egal wat!

(Brouhaha général, hilarité et coups de cloche de la Présidence)

» M. le Président.- Här Bettel, ech hunn lech als Riedner ageschriwwen.

(Brouhaha général)

» M. Fernand Boden, Ministre des Classes moyennes, du Tourisme et du Logement.- Dir sot egal wat!

» M. Jacques-Yves Henckes (ADR).- Här Minister Boden, Dir verwiesselt mech mam Här Bettel. Mä ech wëll just nuren eppes soen,...

(Hilarité et brouhaha)

...dat ass, dass déi Décisiounen... Ech wäert mer erlaben, Här Minister, lech e klengen Avis juridique zoukommen ze loossen.

» Une voix.- Aaaahh!

(Brouhaha et coups de cloche de la Présidence)

» M. le Président.- Wann ech gelift!

» M. Jacques-Yves Henckes (ADR).- Hei hunn ech nämlech eng ganz labber Zuel vun ongeféier 15 Décisiounen, déi an déi Richtung ginn. Dat ass d'Typologie des aides illicites au titre de l'article 87 vum Traité. Do steet dran: «Aide aux investissements concernant l'achat d'un terrain et construction d'un bâtiment». Do gëtt et där Saachen nach e puer, esou dass et héchstwahrscheinlech...

» M. Fernand Boden, Ministre des Classes moyennes, du Tourisme et du Logement.- Här Henckes, hutt Der och schonn eng Kéier de Logement social gekuckt?

» M. Jacques-Yves Henckes (ADR).- Ech hu gekuckt. Et ass kloer: Deen Ablack, wou et ëm de Logement social geet, ass et richteg, dass därëf subsidiéiert a gehollef ginn.

(Interruption)

Mä nure fir de Logement social an nure fir d'Mietwunnengen.

» M. Fernand Boden, Ministre des Classes moyennes, du Tourisme et du Logement.- Dat ass och net richteg.

» M. Jacques-Yves Henckes (ADR).- Mä deen Ablack, wou Der higitt an Dir élar géiert op eng Kéier de Champ d'application aus enger Entreprise publique, esou dass et op munch Aart, dass heescht, dass et en fait d'selwecht ass wéi iergendee private Promoteur, wou hien déiselwecht Missiounen kritt, da geet et net méi.

Et wäerten och, Här Minister, souwisou mat dësem Gesetz nach Schwierigkeete kommen, wann dat Gesetz, wat d'Regierung déposéiert huet iwwert d'Marchés publics, hei an der Chamber gestëmmt gëtt. Well do steet dran, dass all Kéiers wann eng Privatentreprise oder en öffentliche Träger 50% oder méi Subside kritt fir iergendeppes, da muss se iwwert de Wee vum Marché public virgoen, fir déi Aarbechte kënnen ze maachen. Dat ass och eppes, wat nei ass.

Elo wäert Der mer soen: Da maachen ech et mat 49%. Dat ass elo eng aner Geschicht. Mä et gesäit een, dass een op jidde Fall mat dësem Gesetz net weiderkënnst. Et si vill juristesche Schwierigkeeten, ofgesinn och nach elo hei, wat den Traité de Rome ugeet. Mä mir wëssen, dass et viraussichtlech och nach wäert zu Prozesser kommen, wat d'Verfassung ugeet, well och do Contradictiounen sinn a Privileger festgehalde ginn, déi géint ons Verfassung verstoussen. On n'est

pas sorti de l'auberge. Dofir géif ech mengen, dass een op jidde Fall esou engem schlechte Gesetz nuren eng Äntwert ka ginn: Neen!

» M. Xavier Bettel (DP).- Är ganz Fraktioun ass fort. Et huet keen et gepackt vun Ärer ganzer Fraktioun, Här Henckes.

» M. le Président.- Elo huet fir d'éischt den Här Jaerling d'Wuert.

» M. Jacques-Yves Henckes (ADR).- Wann Der d'Aarbechtsfraktioun gesitt, da si mer an de Proportiounen gläich.

» M. le Président.- Elo huet fir d'éischt den Här Jaerling d'Wuert an duerno den Här Bettel. Här Jaerling, wann ech gelift.

» M. Xavier Bettel (DP).- Dir wësst dach näischt am Rechnen.

» M. Aly Jaerling (Indépendant).- Also, Här President, hei ass ee vun deene Momenter, wou ee sech ka freeën, dass wierklech d'Riedezäit begrenzt ass.

» Une voix.- Très bien!

» M. le Président.- Dann ass et um Här Bettel.

» M. Xavier Bettel (DP).- Här President, ech hu schonn alles gesot.

» M. le Président.- Ech hat gemengt, Dir hätt lech wëllen als Riedner hei aschreien, well Der lech esou dacks zu Wuert gemellt hat. Dann ass et elo un der Regierung. Den Här Minister Fernand Boden huet d'Wuert.

» M. Fernand Boden, Ministre des Classes moyennes, du Tourisme et du Logement.- Här President, Dir Dammen an Dir Hären, ech versichen et esou kuerz wéi méiglech ze maachen.

Éischtens emol wëll ech festhalen a soen an nach eng Kéier ënnersträichen, wat anerer och schonn emol gemaach hunn, dass d'Pacte-logements-Gesetz eng couragéiert Äntwert ass op de Wunnengsbauproblem hei am Land.

(Interruption)

Beim éischte Vote hat ech jo gesot, et wier e Pakt vun der Hoffnung fir déi Leit, déi sech en Eegenheem wëllen uschaffen. Woufir? Ma éischstens emol ass et virgesinn, dass d'Offer soll vergréissert ginn duerch d'Konventiounen mat Gemengen. Gemengen, déi sech engagéieren an där Konventioun, fir Efforten ze maachen, eng aktiv Wunnengsbaupolitik ze maachen, fir méi ze wuessen, wéi normal.

Jiddferéen ass mat där Konventioun averstanen, just DÉI GRÉNG net. Ech kommen och nach eng Kéier dorobber zrëck.

D'Zil ass nämlech, fir 3.000 Wunnenge pro Joer kënnen ze bauen. Dat ass en ambitiëst Zil, ech weess dat. Am Fong misst jiddferéen, deen am Handwierk tätég ass, doriwwer frou sinn. Jiddferéen, dee wëllt bauen, misst doriwwer frou sinn, an ech mengen de Stat an d'Gemengen zesumme bréngen et fäerdeg, dass Zil ze erreichen, wa se alleguer un engem Strang zéien a vill Gemenge bereet sinn, esou eng Konventioun mam Stat ze maachen.

Zweetens,...

(Interruption)

Oh, mir wëssen alleguer, dass déi gréisser Offer ganz sécher de Präis wäert drécken. Mir gesinn och eng Rei vu Moosssname vir, fir zousätzlech dat präisgënschtegt Bauen ze förderen, an zwar d'Ierfpachtrecht, wou am Fong d'Käschte vum Terrain neutraliséiert ginn, wat jo och an deem Pacte-logements-Gesetz hei verstärkt a verbessert gëtt. An a Lotissementer iwwer een Hektar, do mussen 10% Logements à coût modéré sinn. Dat wäert also och d'sozial Mixitéit vergréisseren an d'Präisser no ënnen drécke fir Leit, déi manner héich Akommes hunn.

(Brouhaha et coups de cloche de la Présidence)

Dann hat ech och déi leschte Kéier gesot, dass et wichteg wär, dass mer eng besser Maîtrise kréie vu Grond a Buedem. Dat gëtt gemaach iwwert d'Virkaftsrecht, wat jo ville Leit um Mo läit.

D'Chambre immobilière huet dat déi Deeg erëm eng Kéier gesot. Mä ech mengen, dass wär eng gutt Méiglechkeet, fir dass laangfristeg och Stat a Gemenge kënnen am richtige Moment Terrainen op de Marché ginn, fir d'Präisser no ënnen ze drécken. An och iwwert déi Steuerbefreiung vun de Plus-value beim Verkaf u Stat a Gemenge vun Terrainen.

Dann hat ech och gesot déi leschte Kéier, dass et e Pakt vum Däiwel wär fir déi, déi sech duerch iwwerhéichte Baulandpräisser eng gëllen Nues verdénge wëllen.

(Brouhaha)

Ech hunn och d'Impressioun - an ech mengen, vill Leit deelen déi Impressioun -, dass déi Plainte bei der Bréisseler Kommissioun, vun där hei geschwat ginn ass, aus deene Kreesser kënnst.

» Une voix.- Frot den Här Henckes!

» M. Fernand Boden, Ministre des Classes moyennes, du Tourisme et du Logement.- Ech kann nëmme mat der Madame Spautz d'accord sinn, dass et e bëssen,...

(Brouhaha et coups de cloche de la Présidence)

» M. le Président.- Wann ech gelift, da lauschtert awer ee Moment no!

» M. Fernand Boden, Ministre des Classes moyennes, du Tourisme et du Logement.- ...dass deen op d'mannst net vill Courage bewisen huet, fir sech net offen zu där Plainte do ze bekennen.

Wann ee gutt Argumenter huet, da soll ee sech dozou bekennen an déi Argumenter och plädéieren. Si haten dee Courage net, an ech mengen och, dass se net vill Chancen hätten, mat där Plainte duerchzekommen.

Well et ass net wéi den Här Henckes seet, et wär schonn Uerteeler do, wou State verteelt gi waren am Logement social. Am Contraire! Ech hunn dem Här Henckes an och dem Här Gibéryen op d'Questions parlementaires an deem Sënn und geäntwert. Ech hu Jurisprudenzen zitíiert: den Arrêt Altmark. Et ass eng nei Jurisprudenz derbäikomm, den Arrêt BUPA, wou ganz kloer gesot gëtt, dass am Logement social Ausnahme gemaach ginn, dass do d'Länner ganz vill Méiglechkeeten hunn, fir eben do anzewierken, derfir ze suergen, dass an deem Beräich kënnen Efforté gemaach ginn, fir d'sozial Kohesioun ze förderen, an dass d'Länner do eng ganz grouss Fräiheet hunn, fir ze agéieren. Also, mir wäerte schonn op déi Saachen äntwerten.

Bei där Plainte sinn och eng ganz Partie Saache gesot ginn, déi falsch sinn. En Haaptargument vun der Plainte ass, dass gesot gëtt, et wär e Monopol do fir de Fonds du Logement, fir d'SNHBM a fir d'Gemenge beim soziale Wunnengsbau. Dat ass jo guer net richteg! Beim Verkaf kréien d'Privatpromoteuren och Bähëllef. D'privat Bauträger mussen just genee déi Konditiounen erfüllen, déi déi aner och mussen erfüllen.

Bis elo huet een dovun profitéiert, fir en normalen, richtige Lotissement ze maachen. Deen huet och seng Bähëllef kritt. Wat muss hie maachen? Hie muss à livre ouvert beweisen, dass hien all déi Bähëllef, déi hie kritt, weidergëtt un d'Acquéreuren.

Am Reglement ass dat festgehalde ginn. Also jiddfer Privatpromoteur, dee wëllt soziale Wunnengsbau maachen, brauch nëmme bei de Wunnengsbauminister ze kommen, da maache mer eng Konventioun, wou dat drasteet, an da kann hien déi Bähëllef kréien.

Also ass et guer net richteg, wat do an där Argumentatioun steet. Et ass kee Monopol do vum Stat, de Gemengen, der SNHBM oder dem Fonds du Logement, fir soziale Wunnengsbau ze maache wat Vente ass.

Wou se näischt bäikréien, dass ass beim soziale Mietwunnengsbau. Mir wëssen alleguer, dass do iwwerhaapt kee private Promoteur drun denkt fir matzemaachen. Well do d'Loyere fixéiert sinn opgrond vun de Revenuë vun de Leit, déi doranner wunne kommen. Do si Prioritéite festgehalen, wien an esou Wunnenge kommen därëf.

Dat heescht, et ass nëmme en defizitäert Geschäft. Also, wa se et gären hätten, ech ka maachen, dass se déi nämlechte Konditiounen kréie wéi déi aner. Mä ech denken, dass an 20 Joer nach keen drun denkt, fir do Sue bäizeleeën.

Dat heescht, wann dat sollt de Problem sinn, ass guer keng Schwierigkeet do, dass se och ënnert den nämlechte Konditiounen kënnen Logement locatif social maachen, wann dat de Wunsch ebe wär. Mä ech mengen, dass ass en absolut net.

Hei ass et drëm gaangen, fir dee Pacte logement - d'Deputéiert sollten, hu se vläicht gehofft, op eemol Ängscht kréie fir en ze stëmmen - nach weider erauszezögeren, well déi Leit ebe fäerten, duerch de Pacte logement géife vläicht gewësse Saachen, wou se soss konnten déck dervu profitéieren, verluer goen. Ech menge wierklech, dass et wichteg ass, dass dee Pacte loge-

ment kënnt, datt déi Leit, déi wëlle bauen, déi wëlle sech en Eegenheem uschaffen zu gënschtege Konditiounen, zu akzeptabele Konditiounen, nei Chancë kréien.

Dat ass ebe wat d'Regierung wëllt maachen, wat d'Majoritéitsparteië wëlle maachen. Hei muss ee Faarf bekennen.

Fir wien ass een? Ass ee fir déi Leit, déi e gutt Liewe kënnen féiere mat deiere Bauland-präisser, oder ass ee fir déi Leit, déi wëllen zu akzeptabele Konditiounen sech en Eegenheem uschaffen?

(Brouhaha)

D'ADR huet ganz kloer gesot, fir wien datt se ass. Si sinn déi Éischt an déi Vehementst, déi anriede fir déi, déi vill Geld verdéngen mam Wunnensbau. Dat ass déi Partei, déi mengt, si wier fir déi kleng Leit!

(Brouhaha général et coups de cloche de la Présidence)

Déijéineg, déi fir déi Leit sinn, déi wëllen en Eegenheem uschaffen zu akzeptabele Konditiounen, déi sinn och fir gewësse Konditiounen a Moossnamen, déi d'öffentlech Hand kritt, déi d'Gemenge kréien, fir de Wunnensbau e bësse méi käschtegëschteg ze maachen, fir d'Offer kënnen ze vergréisseren. Bis elo war d'ADR op jidde Fall do dergéint.

» **Une voix.** - Très bien!

» **M. Fernand Boden, Ministre des Classes moyennes, du Tourisme et du Logement.** - D'DP wonnert mech och e bëssen, dat muss ech éierlech soen. Ech hunn d'leschte Kéier scho gesot, si hu Motiounen matgestëmmt, wou ähnlech Moossnamen dra waren, wéi se nach an der Majoritéit waren. Elo si se net méi an der Majoritéit, elo renéiere se, elo négéiere se dat, wat se vir-drun am Fong mat begréisst hunn.

(Brouhaha général)

Jo, den Här Berger war an där Regierung! Hie war an där Regierung!

(Interruptions diverses)

Och hir Appréciatioun vum Wunnensbau-maart wonnert mech e bëssen. Ech hu bal ëmmer nëmmen héieren, et wär absolut näischt, wat d'Regierung gemaach hätt, si hätt versot, si hätt alles falsch gemaach.

Dann héieren ech den Här Gudenburg op Chamber-TV soen, mir hätte kee Problem am Verglach mam Ausland. Also ech weess net, wat fir eng DP alt hei schwätzt! Si soen eemol dëst, si soen eemol dat anert.

(Interruptions diverses)

Voilà! Jo, et ass gutt! Ech hu gemengt, Dir géift dann e bëssen anescht handele wéi déi, Dir wäert besser wéi déi.

(Brouhaha et coups de cloche de la Présidence)

» **M. le Président.** - Also, lauschtert emol! Ech versti jo, et ass scho spéit. Mä ech géif awer ëm Är Mataarbecht bieden!

(Brouhaha)

Wësst Der, et sinn net déi Interventiounen, déi hei am haartste sinn, déi ëmmer am fundéiertste sinn! Duerfir loosse mer elo de Minister hei seng Ausféierunge fäerdeg maachen an da komme mer zum Vote.

» **M. Fernand Boden, Ministre des Classes moyennes, du Tourisme et du Logement.** - Wat ass am Fong d'Attitüd vun der DP? Mä si soen, de Maart soll et regelen.

(Brouhaha)

Mir hu bei der Finanzkris gemierkt, wat de Maart alles regelt! Gradesou wéi bei dem Bankesecteur, wéi am Finanzsecteur ass et och hei am soziale Wunnensbausecteur - an am Wunnensbausecteur iwwerhaupt - wichteg, datt Regele bestinn, fir datt jidd-fereeng sech kann dee Wunsch no engem Eegenheem méiglechst erfëllen.

(Interruption)

De Maart eleng huet dat net fäerdeg bruecht. Mir mengen, do musse Moossnamen ergraff ginn, an dëse Pacte logement gëtt de Gemengen, gëtt dem Stat d'Méiglechkeeten, fir kënnen ze intervenéieren, fir datt dee Wunsch no engem Eegenheem kann ënner bessere Konditiounen statt-fannen, wéi dat vir-drun de Fall war.

Wéiwäit datt d'Gemengen an de Stat dës Méiglechkeeten ausnotzen oder ausnotze wëllen, datt ass eng aner Fro.

Hei gi laangfristeg Moossnamen erméiglecht, wou de Stat an d'Gemengen eng besser Maîtrise iwwer Grond a Buedem kréien. Si kënnen sech Réserves foncières uschaffen a si kënnen se am richtege Moment op de Marché bréngen, wann d'Präisser géifen ausuferen.

Ech denken, datt déi Berouegung, déi elo um Maart ass, positiv ass. Ech hoffen, datt se och weidergeet, an ech wëll och soen, datt dat, wat hei gesot ginn ass, guer net richtig ass.

Ech hunn net gesot, dat wier den Erfolleg vum Pacte logement! Deen ass net do.

Ech hu gesot, dat wier den Erfolleg vun enger aktiver Wunnensbaupolitik. An ech hunn an där Ried opgezielt, wou den Här Kox derbäi war, op der Semaine nationale du logement, wat mer alles do gemaach hunn.

(Interruption)

Ech hunn et schonn eng Kéier hei gesot, déi leschte Kéier: 12% Remboursement vun der TVA; all déi Wunnensbaubäihëllefen, déi mir ginn, méi wéi an iergendengem anere Land. Mir hunn x Moossnamen ergraff, déi de Wunnensbau solle förderen; Bäihëllefe fir d'privat an öffentlech Promoteuren, wa se wëlle präisgënschtege Wunnensbau maachen.

(Brouhaha et coups de cloche de la Présidence)

Ech hunn also net gesot, datt et eleng de Mérite vun der aktiver Wunnensbaupolitik vun der Regierung wär. Ech hunn och derbäi gesot, datt d'Banken- a Finanzkris och en Deel zu där Berouegung géif bäi-droen.

Ech géif awer hoffen a wënschen an och mengen, datt mer net déi nämlecht katas-trophal Zoustänn kréie wéi an Amerika oder an aneren Nopeschlänner, wou en dras-tescht Erfolge vun de Präisser ass. Och dat wier net ganz glécklech fir d'Lëtzebuurger Economie.

» **M. le Président.** - Här Minister, entschëllegt. Erlaabt Der eng Tëschefrou vum honorabelen Här Bettel?

» **M. Fernand Boden, Ministre des Classes moyennes, du Tourisme et du Logement.** - Jo.

» **M. Xavier Bettel (DP).** - Här President, den Här Minister huet jo elo just vun der DP geschwat. Ech wëll hie just froen: Hunn d'Gemengen op de Pacte logement gewaart, fir elo Sozialwunnengen ze bauen? A wivill Gemenge sinn da schonn interes-séiert um Pacte logement? Well de Minister, d'Regierung huet et jo ugekënnegt. Et schéngt, datt schonn déi eng oder aner Gemeeng hir Mécontentementer an hir Hostilitéit vis-à-vis vum Pacte logement gewisen hunn. Wivill Gemenge sinn et da schonn, wou dat da soll lafen?

Elo sinn ech awer och gespaant op d'Äntwert, Här President.

» **M. Marc Spautz (CSV).** - Mir hu misse 16 Joer waarden, bis d'Stad Lëtzebuerg, vun 1980 un...

» **M. le Président.** - Här Spautz, et ass den Här Minister, deen äntwert!

(Hilarité)

» **M. Fernand Boden, Ministre des Classes moyennes, du Tourisme et du Logement.** - Also, wann ech et gutt an Erënnung hunn, Här Bettel, sinn an der Wahlcampagne fir d'Gemengerotswahlen Zuele genannt gi wéi wann an deene sechs Joer vir-dru 60 Wunnengen vun der Gemeng aus geschaaft gi wären. Also, d'Stad Lëtzebuerg huet wierklech keng grouss Mériten.

» **Plusieurs voix.** - Ooohhh!

» **M. Fernand Boden, Ministre des Classes moyennes, du Tourisme et du Logement.** - Ech hoffen a wënschen...

(Interruption)

Oh, ech hunn dat déi leschte Kéier am Detail erkläert. Ech kann et och nach eng Kéier erklären.

» **M. Xavier Bettel (DP).** - Dat musst Der dem Här Mosar erklären, dee fir de Logement zoustänneg war, Här Boden. Sot dem Här Mosar dat. Hie wäert sech iwwer Äre Kommentar freeën.

» **M. Fernand Boden, Ministre des Classes moyennes, du Tourisme et du Logement.** -

Ech kann et nach eng Kéier hei widerhuelen.

(Brouhaha général)

» **M. le Président.** - Mä lauschtert emol!

» **M. Fernand Boden, Ministre des Classes moyennes, du Tourisme et du Logement.** -

Ech kann et nach eng Kéier hei widerhuelen.

» **M. Gast Gibéryen (ADR).** - Da sot och, wien zoustänneg war!

» **M. Ben Fayot (LSAP).** - Also, den Här Bettel ass wierklech dee Leschten, deen hei därerf optrompen.

» **Plusieurs voix.** - Ah!

» **M. Fernand Boden, Ministre des Classes moyennes, du Tourisme et du Logement.** - Ech wëll just soen, datt ech e groussen Intérêt bei de Gemenge fanne fir e Pacte logement ze maachen. Wivill der finalement effektiv matmaachen, dat kann ech lech elo net soen. Mir hu Kontakter mat 70 Gemenge gehat. Eng ganz Rei vu Gemenge si begeeschtert, fir matzemaachen an hunn och gudd Wëllen, fir eppes do ze realiséieren, fir ze kucken d'Prozeduren ze beschleunegen, fir aktiv matzehëllefen.

Wou sinn elo Mécontentementer komm, wéi ech dat gelies hunn? Dat ass dee Problem vun den 30 Awunner, déi Minimum musse kommen. Dat ass eppes, wat net a mengem Projet de loi war. Dat ass eppes, wat an der Chamber derbäigesat ginn ass.

(Interruption)

Et ass och net richtig - dat wëll ech och nach soen -, datt se all Joer mussen ëm 30 Awunner wuessen. Si mussen an zéng Joer ëm 15% wuessen. A wa se an engem Joer manner wéi 30 Awunner bäikréien, da kréie se fir dat Joer keng Bäihëllefen. Wa se dat Joer duerno ëm 50 Awunner wuessen, da kréie se natierlech eppes fir dat Joer. Dat heescht, et ass guer net esou, datt een all Joer muss ëm 30 Awunner wuessen. Et muss een an deenen zéng Joer ëm 15% gewuess sinn. Dat ass et.

Ech muss soen, ech wannere mech iwwert den Här Kox, deen elo hei mécht wéi wann d'Gemenge géife schlecht ewechkommen. Déi leschte Kéier huet hien hei gesot, mir géifen de Landgemengen d'Suen nogehéien an déi dierften iwwerhaupt net wuessen. Hien huet dat och haut erëm hallef gesot, mä et weess een net richtig wat säi Message ass.

Mir hunn déi réckwierkend Moossnam gemaach. Dat huet och d'Chamber gemaach - dat wëll ech soen -, fir just derfir ze suergen, datt déi kleng Gemengen, déi zënter 2003 vill gewuess sinn, net nach mussen onbedéngt an den nächste Jore gradesou vill wuessen, datt déi kënnen déi lescht véier Joer ugerechent kréien, an datt mer deene wollten entgéintkommen, fir och kënnen vum Pacte ze profitéieren.

Ech hunn et schonn eng Kéier gesot: Et verléiert keen eppes beim Pacte. Dat Schlëmmst, wat engem ka geschéien, dat ass, datt en null Frang kritt, wann e keng Konditiounen, déi en opgeschriwwen huet, erfëllt.

(Coups de cloche de la Présidence)

Mä et ass eng eemoleg Geleeënheet, fir sech Gedanken ze maachen: Wat soll an den nächsten zéng Joer bei eis an der Gemeng um Wunnensbaumaart geschéien? Wou sinn déi Projeten, déi mer wëlle prioritär virundreiwen? Wivill Wunnenge ginn dat? Wivill Awunner kommen da bei eis weider? Da muss een eng zweet Lëscht maachen: Dee Wuesstem do, wat comportéiert deen un Infrastrukturen, déi ech muss maachen? Déi Suen, déi se kréien, si jo geduecht, fir déi Infrastrukturen kënnen ze finanzéieren.

Ech menge schonn, datt dee Pacte logement eng gutt Saach ass. Wéi gesot, ech hoffen a wënschen, datt ganz, ganz vill Gemengen do matmaachen. Ech hunn nach gudd Mutt, datt dat esou ass. An ech mengen, datt dee Message, dee mer wëlle ginn, datt d'Gemenge solle matmaachen, och gehéiert gëtt. Ech mierken natierlech, datt gewësse Leit frou wären, wann et der net esou vill wären, mä déi Gemengen, déi net matmaachen, sinn net um richtege Wee.

Da wëll ech just nach op eng Saach agoen, wou och hei vum Här Berger gesot ginn ass, mir hätten eis iwwert d'Bedenke vum Statsrot ewechgesat. Ech muss éierlech soen, datt ech net ganz frou sinn, wéi gewësse Prozeduren hei bei eis am Stat oflafen. Dat soll ee vläicht an aller Rou eng Kéier seriö iwwerdenken.

Mir wëssen, datt de Statsrot Problemer mat dësem Projet de loi hat. Hien huet eng ganz Rei vu Bedenken ugemellt. Hien huet och Opposition-formell gemaach. Dobäi huet d'Chamberskommissioun an och d'Regierung x Amendementer gemaach, fir deene Bedenken do entgéintzekommen. Et si fina-

lement och vun - ech mengen - 13 Opposition-formellen, déi gemaach si ginn, der dräi rescht bliwwen.

Vun deenen dräi, déi rescht bliwwen sinn, huet d'Chamberskommissioun sech d'Méi gemaach, fir ze argumentéieren, woufir datt si mengen, datt déi dräi Opposition-formellen net berechtegt wären, datt se net ëmmer hirer Meenung no juristesche 100% an einwandfräi argumentéiert wären.

Dat ass esou hei vun der Kommissioun kloer an engem Rapport schrëftlech, vum Norbert Hauptert och mëndlech, gesot ginn. Ech selwer hunn e puer Argumenter do bruecht. Wat ass d'Resultat dovunner?

Da geet dat nom éischte Vote bei de Statsrot. De Statsrot argumentéiert iwwerhaupt net. An engem Saz setzt e sech ausenaner mat den Argumenter, déi hei an der Chamber dévoppéiert gi sinn, vun der Chamber, vun der Kommissioun. Si soen einfach: Mir refuséieren d'Dispens vum zweete Vote. Ech weess net, ob dat an enger Demokratie, an engem demokratesche Matenaner dee richtege Wee ass. Domadder muss ee sech ausenansetzen.

Wann d'Chamber haut an hirer Majoritéit seet: Neen, et ass näischt geschitt. Mir hunn e Vote gemaach, duerno ass einfach Nee gesot ginn, ouni Argument. Da soe mir: Da bleiwe mir bei deem, wat mer gesot haten a mir stëmmen och dat, wat mer d'leschte Kéier gestëmmt hunn. Ech géif d'Chamber bieten, esou ze stëmmen, wéi se et d'leschte Kéier gemaach huet.

Ech soen lech Merci.

(Interruptions)

» **M. le Président.** - Merci, Här Minister. Dir Dammen an Dir Hären, domat ass d'Debatt ofgeschloss. Mir kommen elo zum zweete Vote constitutionnel vun dësem Projet.

Second vote constitutionnel

Dir Dammen an Dir Hären, de Projet de loi 5696 ass ugehall mat 38 Jo-Stëmmen, bei 21 Nee-Stëmmen an 1 Abstentioun.

Ont voté oui: Mmes Sylvie Andrich-Duval (par M. Lucien Clement), Nancy Arendt (par M. Laurent Mosar), M. Lucien Clement, Mmes Christine Doerner (par M. Marcel Oberweis), Marie-Josée Frank (par M. Ali Kaes), Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch (par M. Marc Spautz), MM. Ali Kaes, Paul-Henri Meyers, Laurent Mosar, Marcel Oberweis, Gilles Roth, Patrick Santer, Marcel Sauber, Jean-Paul Schaaf (par M. Martine Stein-Mergen), Marco Schank, Marc Spautz, Mme Martine Stein-Mergen, MM. Fred Sunnen, Lucien Thiel (par M. Michel Wolter), Lucien Weiler et Michel Wolter;

MM. Marc Angel, Alex Bodry, John Castegnaro, Mme Claudia Dall'Agnol, M. Fernand Diederich, Mme Lydie Err (par Mme Claudia Dall'Agnol), MM. Ben Fayot, Jean-Pierre Klein, Mme Lydia Mutsch, MM. Roger Negri, Jos Scheuer (par M. John Castegnaro), Romain Schneider (par M. Alex Bodry), Roland Schreiner et Mme Vera Spautz.

Ont voté non: MM. Eugène Berger, Xavier Bettel, Mme Anne Brasseur, M. Fernand Etgen, Mme Colette Flesch, MM. Charles Goerens, Paul Helming (par M. Xavier Bettel), Alexandre Krieps (par M. Fernand Etgen), Claude Meisch (par M. Eugène Berger) et Carlo Wagner;

MM. Claude Adam, François Bausch, Félix Braz (par M. Claude Adam), Camille Gira (par M. François Bausch), Jean Huss, Henri Kox et Mme Viviane Loschetter (par M. Jean Huss);

MM. Gast Gibéryen, Jacques-Yves Henckes, Jean-Pierre Koepf (par M. Gast Gibéryen) et Robert Mehlen (par M. Jacques-Yves Henckes).

S'est abstenu: M. Aly Jaerling.

Mir sinn um Enn vun eisen Aarbechten ukomm. Déi nächst Sitzung ass muer de Mëtteg um hallwer dräi.

D'Sitzung ass opgehuewen.

(Fin de la séance publique à 21.03 heures)